



*Jumat, 28 Januari 2022*

**Ogen: Kejadin 1:20-25**



**Si Nдеми Awang-awang Ras Lawit**



Perciptan bas wari pelimaken, tetap ncidahkan kuasa ras mbelinna cara rukur Tuhan. Ia ngasup nepa tinepa-tinepa si maba ras mbelin. Proses Tuhan nepa e, ncidahkan kiniraturen ras Jilena perukurenNa. Ibenakenna alu si sifatna umum, si mbelinna siniperluken kerina tinepa seh ku si kitikna si sifatna detail ras unik. Erbage-bage singgeluh bas lau, ngatakenca lit erbage-bage tinepa Tuhan i bas laut. Janah kuasaNa nge sierbahanca lau mereken ulihna selaku rumah man kerina bekas tinepa Tuhan i je. Tuhan pe mperjile lawit alu perik-perik si lanai kel lang-lang buena, subuk jumlah bage pe jenisna. Bage me kuh tinepa Dibata e.

Si e ngatakenca, perlu nge siusih cara kerja Tuhan e. Ia erdahin la meros, erperkiraan ras ratur. Metenget Ia ndahiken apai nge si perlu arah lebe, bage pe apai ka seterusnya, guna njadikan kegeluhen si sikap ras mulia. Tole pe arah penciptan wari pelimaken enda, secara tersirat ate Tuhan nuduhkenca man banta, ku ja pe matata natap i je lit kemulian Tuhan. Adi sitatap pe ku teruh, sabab lau inganna i teruh, i je erbage-bage bekas perbahanen Tuhan mulai si kitikna nari seh ku si mbelinna. Adi sitatap ku datas pe seh buena perik-perik si kabang si maba pesan arah Tuhan nari, makana IA erkuasa ras dem kiniulin.

Alu bage kita arus terus ngataken bujur man Tuhan. Si enggo nepa kerinana se isi doni enda alu mehuli. Si jagai lau, kerina sumber lau, subuk parik, lau belin, laut arah kerina si banciancedai rumah kerina rubia-rubia si tading bassa. Bage pe sisuani batang kayu gelahna baci jadi asar perik-perik e, gelah lalap ia terjaga, gelah kerina erbage-bage tinepa si mejile sora ras rupana e tetap banci jadi dalanta muji gelar Tuhan, tinepa sinasana. Kerina si nggeluh bas lau, ras sikabang bas lawit enda, "kakanta" siperlu si pekena-kena.

